

SAMOA

Faatulagaina o Aiaiga

VAEGA I FAATOMUAGA

1. Igoa puupuu ma le amataga
2. Faamatalaina o uiga o upu
3. O lenei Tulafono ua noatia ai le Malo

VAEGA II O LE FONO A TAGATA POTO FAAPITOA I VAILAAU MO TOGAFITIGA

4. Fono a Tagata Poto Faapitoa i Vailaa mo Togafitiga
5. Failautusi o le Fono
6. Fonotaga a le Fono
7. Galuega tauave ma Malosiaga o le Fono

VAEGA III O LE SOSAIETE A TAGATA POTO FAAPITOA I VAILAAU MO TOGAFITIGA

8. Manaoga o le faamauina faale tulafono

VAEGA IV TULAGA FAATAATITIA MO TOMAI FAAPITOA

9. Tulaga faataatitia mo tomai faapitoa e ao ona fuafuaina e le Fono
10. Tulaga faataatitia mo tomai faapitoa o lo o faaaogāina i isi tomai faapitoa tau soifua maloloina e ao ona amanaiaina.

VAEGA V FAAMAUINA O TAGATA POTO FAAPITOA I VAILAAU MO TOGAFITIGA

11. Agavaa mo le faamauina
12. Tusi talosaga mo le faamauina
13. Ia iloiloaina e le Fono tusi talosaga
14. Faaiuga a le Fono
15. Tusi faamaonia o le faamauina
16. Tusi faamaonia faale tausaga e galue ai
17. Tusi faamaonia le tumau e galue ai

**VAEGA VI
FAAFOEGA O AMIOGA
PULEA A TAGATA POTO
FAAPITOA I VAILAAU MO
TOGAFITIGA**

18. Tualumaga o amioga pulea e faatatau i tagata poto faapitoa i vailaa mo togafitiga
19. Toe faamauina

**VAEGA VII
TOMAI FAAPITOA
LAGOLAGO TAU FALE
TALAVAI**

20. Faatonuina o tagata galulue fesoasoani i fale talavai ma tekinesia

**VAEGA VIII
SOLITULAFONO**

21. Galue faasolitulafono e faapea o se tagata poto faapitoa i vailaa mo togafitiga
22. Faamoemoe sese e avea ai o se tagata poto faapitoa i vailaa mo togafitiga
23. Vaavaaia o fale talavai e se tagata poto faapitoa i vailaa mo togafitiga
24. Faamauina i se faiga sese
25. Mauaina o komisi mai fomai ma fomai nifo

**VAEGA IX
AIAIGA ESEESE**

26. E leai se tagi e mafai ona faia e faasaga i le Fono ma isi
27. Totogifuapauina
28. Tulafono Faatonutonu
29. Soloia
30. Aiaiga tau soloaiga ma aiaiga faasaoina

2007, Nu. 6

O SE TULAFONO ina ia aiaia ai le faavaeina o se Fono toefuatai a Tagata Poto Faapitoa i Vailaa mo Togafitiga mo le pulea o tomai faapitoa o galuega tau fale talavai i totonu o Samoa ma mo le fuafuaina ma le faamallosia o tulaga faataatitia mo tomai faapitoa faapea manaoga o lo o faaaogāina i tagata poto faapitoa i vailaa mo togafitiga ma tagata fesoasoani i tagata poto faapitoa i vailaa mo togafitiga ma tagata poto faatekinisia i vailaa mo togafitiga ma mo mataupu e faasino i ai.

UA FAIA e le Fono Aoao Faitulafono a Samoa i totonu o le Palemene ua potopoto e faapea:

VAEGA I FAATOMUAGA

1. Igoa puupuu ma le amataga-(1) E mafai ona taua lenei Tulafono o le Tulafono o Fale Talavai 2007.

(2) O lenei Tulafono e tatau ona amata faamamaluina i se aso e filifilia e le Minisita.

(3) O le Faasilasilaga o le amata faamamaluina o lenei Tulafono e tatau ona lomia faasalalau i le gagana Samoa ma le gagana Peretania i le Savali ma se isi nusipepa o lo o faasalalauina i totonu o Samoa.

2. Faamatalaina o uiga o upu-(1) I totonu o lenei Tulafono, ae vagana ai e manaomia i le mataupu se isi uiga e ese ai -

“tomai faapitoa lagolago tau fale talavai” o lona uiga so o se tagata faigaluega e galue i fale talavai ua faatonuina i lalo o le Vaega VII;

“Ofisa Sili o Pulega” o lona uiga o le Ofisa Sili o Pulega o le Matagaluega o le Soifua Maloloina;

“Taitaifono” o lona uiga o le Taitaifono o le Fono, ma e aofia ai so o se sui auai o le Fono ua tofia e avea ma taitaifono le tumau;

“Fono” o lona uiga o le Fono a Tagata Poto Faapitoa i Vailaau mo Togafitiga ua faavaeina i lalo o le fuaiupu 4;

“sui auai i luga o le tulaga tofi” o lona uiga o se sui auai o ia lea o lo o umia le tofiga i le Fono ona o lona tulaga tofi o lo o i ai, ma o ia e tatau ona i ai le malosiaga atoatoa e palota ai o se sui auai o le Fono;

“Tulafono o le Faamauina ma Tulaga Faataatitia mo Tomai Faapitoa tau Soifua Maloloina” o lona uiga o le Tulafono o le Faamauina ma Tulaga Faataatitia mo Tomai Faapitoa tau Soifua Maloloina 2007;

“Minisita” o lona uiga o le Minisita e nafa ma le Matagaluega mai lea taimi i lea taimi;

- “Matagaluega” o lona uiga o le Matagaluega o le Soifua Maloloina ua faavaeina e tusa ai o le Tulafono o le Matagaluega o le Soifua Maloloina 2006;
- “Auaunaga Faa-Soifua Maloloina” o lona uiga o le Auaunaga Faa-Soifua Maloloina ua faavaeina i lalo o le Tulafono o le Auaunaga Faa-Soifua Maloloina 2006;
- “Tagata Poto Faapitoa i Vailaau mo Togafitiga” o lona uiga o se tagata poto faapitoa i vailaau mo togafitiga ua agavaa ma faamauina e tusa ai o lenei Tulafono ma le Tulafono o le Faamauina ma Tulaga Faataatitia mo Tomai Faapitoa tau Soifua Maloloina;
- “Fale Talavai” o lona uiga o se nofoaga po o se pisinisi o lo o tuuina atu ai ma saunia fualaau, vailaau ma isi oloa tau vailaau ma togafitiga;
- “Sosaiete o Tagata Poto Faapitoa i Vailaau mo Togafitiga” o lona uiga o le Sosaiete o Tagata Poto Faapitoa i Vailaau mo Togafitiga a Samoa o le a faamauina faale tulafono i lalo o le pule faataga a le fuaiupu 8;
- “galue tumaoti” o lona uiga o le galuega faa-talavai e faia e tagata poto faapitoa i vailaau mo togafitiga o i latou ia e le o faafaigaluegaina e le Malo ina ia galulue tumau i galuega i fale talavai;
- “tulaga faataatitia mo tomai faapitoa” e aofia ai tulaga faataatitia o amioga mo tomai faapitoa, manaoga ma fetuunaiga o le vaaiga o galuega;
- “Tusi resitala” o lona uiga o le Tusi resitala o Tagata Poto Faapitoa i vailaau mo Togafitiga o lo o tausia e le Resitara ina ia tusa ai ma aiaiga o le Tulafono o le Faamauina ma Tulaga Faataatitia mo Tomai Faapitoa tau Soifua Maloloina;
- “Tagata ua faamauina” o lona uiga o tagata ua faamauina o tagata poto faapitoa i vailaau mo togafitiga i lalo o lenei Tulafono;
- “Resitara” o lona uiga o le Resitara o Tagata Tomai Faapitoa tau Soifua Maloloina ua tofia i lalo o le Tulafono o le Faamauina ma Tulaga Faataatitia mo Tomai Faapitoa tau Soifua Maloloina;

“Samoa” o lona uiga o le Malo Tutoatasi o Samoa;

“Failautusi” o lona uiga o le Failautusi o le Fono.

(2) Afai o se tofiga ua taua i lenei Tulafono ua faamutaina i se taimi mulimuli ane, e mafai e le Ofisa Sili o Pulega ona fuafua le tofiga aupito talafeagai mo le tofiga ua taua, ma o lona tofiga e tatau ona faatatauina ai e faapea ua suia ai le tofi lea ua faamutaina.

3. O lenei Tulafono ua noatia ai le Malo – O lenei Tulafono ua noatia ai le Malo, ae leai se mea i totonu o lenei Tulafono e tatau ona aafia ai -

(a) so o se aia tatau a le Malo, le Matagaluega po o le Auaunaga Faa-Soifua Maloloina ina ia faia ni togafitiga mo vailaau malolosi, vailaau ma isi oloa tau vailaau mo togafitiga ma sauniuniga o lo o tuuina mai po o i so o se falemai a le Malo, vaega mo togafitiga po o auaunaga tau soifua maloloina, po o so o se isi lava Lala Sooupu a le Malo;

(b) so o se fale talavai a le Malo po o so o se isi tagata ofisa o le Malo o ia lea e faasoasoina vailaau malolosi, vailaau ma isi oloa tau fale talavai ma sauniuniga i luga o le pule faataga a le Ofisa Sili o Pulega po o le Auaunaga Faa-Soifua Maloloina.

VAEGA II

O LE FONO A TAGATA POTO FAAPITOA I VAILAAU MO TOGAFITIGA

4. Fono a Tagata Poto Faapittoa i Vailaau mo Togafitiga-(1) Ua faavaeina nei se Fono a Tagata Poto Faapittoa i Vailaau mo Togafitiga ma e tatau ona faamauina matafaioi a le Komiti o le Fale Talavai lea sa faavaeina i lalo o le Tulafono o le Fale Talavai 1976.

(2) O le Fono a Tagata Poto Faapittoa i Vailaau mo Togafitiga e tatau ona avea o se itutino faamauina faale tulafono ma e mafai ona –

- (a) faia ni konekarate;
 - (b) umia meatotino;
 - (c) tausia ni teugatupe i le faletupe; ma
 - (d) faia ni moliaga ma e molia foi i le igoa o le Fono.
- (3) E tatau ona avea ma sui auai o le Fono a Tagata Poto Faapitoa i Vailaau mo Togafitiga -
- (a) le Ofisa Sili o Pulega, o ia lea e tatau ona avea ma sui auai ona o lona tulaga tofi;
 - (b) le Pule Sili o le Auaunaga Faa-Soifua Maloloina, o ia lea e tatau ona avea ma sui auai ona o lona tulaga tofi;
 - (c) ni tagata poto faapitoa i vailaau mo togafitiga se toatolu (3) ua tofia e le Sosaiete o Tagata Poto Faapitoa i Vailaau mo Togafitiga (o le toatasi o i latou o se tagata poto faapitoa i vailaau mo togafitiga o lo o faafaigaluegaina e le Matagaluega po o le Auaunaga Faa-Soifua Maloloina);
 - (d) le Tagata Sinia poto faapitoa i vailaau mo togafitiga i le Matagaluega po o le Auaunaga Faa-Soifua Maloloina, ua tofia i lea tofia e le Ofisa Sili o Pulega, o ia lea e tatau ona avea o se sui auai ona o le tulaga tofi;
 - (e) se loia mai le Ofisa o le Loia Sili ua tofia e le Loia Sili;
 - (f) se fomai ua tofia e le Fono a Fomai; ma
 - (g) ni sui auai se toalua (2) o tagata lautele ua tofia e le Minisita o i laua ia e i ai tomai lea e manatu le Minisita, ina ua uma ona feutagai ma le Fono e mafai ona fesoasoani i faiga faaiuga a le Fono.
- (4) E tatau i sui auai o le Fono ona tofia se sui auai o le Fono e avea ma Taitaifono, ma e mafai ona palota i le taimi e tasi i tausaga faale kalena taitasi ina ia suia ai le tofiaina o le Taitaifono:
- AE VAGANA AI E FAAPEA** na o se tagata poto faapitoa i vailaau mo togafitiga e mafai ona tofia o se Taitaifono o le Fono; ma

AE VAGANA AI E FAAPEA i le toesea ai po o le lē avanoa o le Taitaifono, e mafai e le Fono ona tofia se isi sui auai o le Fono o ia lea o se tagata poto faapitoa i vailaau mo togafitiga e taitaia se fonotaga a le Fono pe afai o lo o toesea po o ua le avanoa le Taitaifono.

(5) E tatau i sui auai o le Fono ona umia tofi mo se vaitaimi e tolu (3) tausaga, ma e tatau ona agavaa mo le toe tofia.

(6) E mafai e le Fono ona palota ina ia aveese se sui auai o le Fono i luga o mafuaaga o le -

- (a) lē mafai ona faatino a latou galuega tauave ma tiute tauave i lalo o lenei Tulafono ona o se faaletonu i le tino po o le mafaufau;
- (b) gaumativa;
- (c) faatamala i tiute tauave;
- (d) amio le pulea a o umia le tofi;
- (e) amio le pulea i se isi nofoaga lea ua aafia ai po o e ono aafia ai le faafoega po o le igoa lelei o le Fono;
- (f) lē mafai ona faailoa ma faia laasaga uma ina ia alofia ai so o se aia feteenai moni pe manino e faasino i lo latou avea ai ma sui auai o le Fono;
- (g) faaaogāina o faamatalaga e fitoitonu i po o e i lalo o le pulega a le Fono e ese mai nai lo le faaaogāina mo galuega tauave a le Fono;
- (h) lē mafai ona galue faamaoni o se sui auai o le Fono;
- (i) faaaogā sese o o latou tulaga po o le pule i le avea ai o se sui auai o le Fono e sailia ai po o e mauaina ai se faamanuiaga mo i latou lava po o so o se isi lava tagata po o se itutino;
- (j) tuua o Samoa mo se vaitami e silia le ono (6) masina vagana ai ua faamaonia e le Fono le vaitaimi ua toesea ai;
- (k) lē auai i fonotaga sosoo e tolu a le Fono e aunoa ma le tuuina atu o se faanoi i le Fono e tusa ai o le toesea o le sui auai;
- (l) amioga le pulea i luga o le galuega po o le solia o tulaga faataatitia mo tomā faapitoa ua faamaonia mo tagata poto faapitoa i vailaau mo togafitiga e tusa ai o lenei Tulafono.

(7) E tatau ona avanoa se tofi o so o se sui auai o le Fono pe afai o le sui auai -

- (a) ua aveesea mai le tofi i lalo o le faafuaiupu (6); po o
- (b) ua maliu; po o
- (c) ua faamavae mai le Fono e ala i le tuuina atu o se faasilasilaga tusitusia i le Failautusi -

e uiga i lenei mataupu ma e mafai ona faatumu le avanoa i le tofiga o le sui auai i le faiga lea sa faaaogāina muamua i le tofiaina o le sui auai.

(8) E tatau i sui auai taitoatasi o le Fono ona totogi mai i faaputugatupe a le Matagaluega, o ia totogi ma alauni e pei ona faamaonia e le Kapeneta mai lea taimi i lea taimi mo sui auai o Komiti Faatino ma Komiti a le Malo.

5. Failautusi o le Fono-(1) E tatau i le Fono ona tofia se toatasi (1) o ona sui auai e avea ma Failautusi i le Fono.

(2) E tatau i le Failautusi ona avea ma ana matafaioi le feutagai ma le Resitara ina ia faamautu le faatinoga atoatoa o aiaiga o lenei Tulafono ma le Tulafono o le Faamauina ma Tulaga Faataatitia mo Tomai Faapitoa tau Soifua Maloloina.

(3) E le tatau i le Failautusi ona tuuina atu se faasilasilaga tusitusia po o se faatonuga i le Resitara e faasino i le faamauina po o amioga pulea a se tagata poto faapitoa i vailaau mo togafitiga, po o le fuafuaina o tulaga faataatitia mo tomai faapitoa o lo o faaaogāina i tagata poto faapitoa i vailaau mo togafitiga vagana ai -

- (a) ua faatagaina e le Fono le Failautusi ina ia faapea ona fai; ma
- (b) o le faasilasilaga po o le faatonuga o lo o tusa ai ma aiaiga o lenei Tulafono ma le Tulafono o le Faamauina ma Tulaga Faataatitia mo Tomai Faapitoa tau Soifua Maloloina.

6. Fonotaga a le Fono-(1) E mafai e le Taitaifono po o le Resitara ona talosagaina le Failautusi ina ia taloina se fonotaga a le Fono ma e tatau ona faamautu e faapea ia faia se fonotaga a le Fono a itiiti mai o le tasi i tausaga faale kalena taitasi.

(2) E tatau i le Failautusi ona talo se fonotaga a le Fono pe afai e talosagaina i se faiga tusitusia le faia e ni sui auai se toatolu (3) o le Fono.

(3) E mafai e le Fono ona talosagaina fesoasoani mai le Resitara e faasino i le taloina o fonotaga a le Fono, le faamaumauina o taualumaga a le Fono ma le tulaga e mafai ai e le Fono ona avanoa i so o se fautuaga faale tulafono pe faatekinisia.

(4) I so o se fonotaga a le Fono a itiiti mai o le afa, faaopoopo i ai ma se sui auai e toatasi (1) o le Fono e tatau ona maua ai le numera o sui auai e mafai ai ona usuia se fonotaga.

(5) I fonotaga taitasi uma a le Fono e tatau i le Taitaifono ona i ai sana palota e faia ai se filifiliga ma, i le tulaga o le tutusa o palota, e tatau i le Taitaifono ona i ai sana palota e faia ai se faaiuga.

(6) O fesili taitasi uma ua i luma o le fonotaga a le Fono e tatau ona faia i ai se faaiuga e se vaega toatele o palota a sui auai o lo o auai i le fonotaga.

(7) Ae vagana ai e ese se uiga ua aiaia i totonu o lenei Tulafono po o i so o se tulafono faatonutonu, e mafai e le Fono ona faatonu ana taualumaga ua ia manatu e talafeagai ai.

(8) E mafai ona faamaonia iugafono a le Fono pe afai -

(a) ua tuuina atu e le Failautusi i sui auai uma o le Fono se ata o pepa talafeagai uma faatasi ma se ata faataitai o iugafono; ma

(b) a itiiti mai o le afa, faaopoopo i ai ma se toatasi (1) o sui auai ua faailoa lo latou maliega i le iugafono i se faiga tusitusia po o le auina atu i le fesi po o le i-meli.

7. Galuega tauave ma Malosiaga o le Fono-(1) O galuega tauave a le Fono o le -

(a) faafoe o taualumaga o lo o faaaogāina i le faamauina ma amioga pulea a tagata poto faapitoa i vailaau mo togafitiga e pei ona aiaia i lenei Tulafono ma le Tulafono o le Faamauina ma Tulaga Faataatitia mo Tomai Faapitoa tau Soifua Maloloina;

- (b) fuafua agavaa ma poto masani talafeagai mo le faamauina e aveva o se tagata poto faapitoa i vailaau mo togafitiga;
- (c) fuafua so o se agavaa ma poto masani talafeagai mo se tagata poto faapitoa i vailaau mo togafitiga ina ia galue tumaoti po o le galue ai mo le Auaunaga Faa-Soifua Maloloina;
- (d) fuafua manaoga mo aoaoga faaauau ina ia tauaveina e tagata ua faamauina;
- (e) fuafuaina tulaga faataatitia o tomai faapitoa e faaaogā i tagata poto faapitoa i vailaau mo togafitiga ma galuega tau vailaau i totonu o Samoa;
- (f) faailoa atu tulaga faataatitia o tomai faapitoa ina ia iloa e tagata ua faamauina i so o se faiga ua manatu le Fono e talafeagai;
- (g) fesoasoani i le Resitara i le mataituina lelei ma le faamalosia o tulaga faataatitia o tomai faapitoa ua faamaonia ma logoina le Resitara i ni soligatulafono ua masalomia mo le faia o ni suesuega;
- (h) fautuaina le Matagaluega, le Auaunaga Faa-Soifua Maloloina ma isi ofisa sooupu o le Malo e uiga i mataupu e faasino i vailaau faa-fomai ma togafitiga ma isi mataupu e talafeagai ma le galuega tau vailaau mo togafitiga;
- (i) fesoasoani i le Matagaluega ma le Auaunaga Faa-Soifua Maloloina e atiae, mataitu ma faamalosia faiga faavae e talafeagai i vailaau malolosi, oloa mo togafitiga ma le galuega tau vailaau mo togafitiga ina ia puipuia le soifua maloloina o tagata lautele; ma
- (j) atiae ma faatino faatulagaga mo le faatonutonuina o tagata galulue fesoasoani i galuega tau vailaau mo togafitiga ma tekinesia o galuega tau vailaau ma le uunaia o a latou galuega i galuega tau tomai faapitoa;

- (k) fuafua ni aia tatau o tomai faapitoa o tagata poto faapitoa i vailaau mo togafitiga e talafeagai i le faatinoga o a latou galuega tau vailaau mo togafitiga;
- (l) fesoasoani i le foia o feeseeseaiga e mafai ona tulai mai i le va o tagata poto faapitoa i vailaau mo togafitiga.
- (2) E mafai e le Fono ona faatino so o se malosiaga -
 - (a) ua faatonuina e lenei Tulafono, le Tulafono o le Faamauina ma Tulaga Faataatitia o Tomai Faapitoa tau Soifua Maloloina ma so o se tulafono talafeagai; ma
 - (b) e talafeagai pe ono tulai mai i so o se galuega tauave, tiute po o matafaioi a le Fono ua aiaia i totonu o lenei Tulafono, le Tulafono o le Faamauina ma Tulaga Faataatitia o Tomai Faapitoa tau Soifua Maloloina ma so o se tulafono talafeagai.

**VAEGA III
O LE SOSAIETE O TAGATA POTO FAAPITOA I
VAILAAU MO TOGAFITIGA**

8. Manaoga o le faamauina faale tulafono – E ui lava i so o se manaoga o fuaiupu 3 ma le 6 o le Tulafono o Sosaiete ua Faamauina Faaletulafono 1952 ma so o se isi aiaiga o lena tulafono i le tulaga e ese ai, e mafai ona faamauina faale tulafono le Sosaiete o Tagata Poto Faapitoa i Vailaau mo Togafitiga i lalo o lena Tulafono faatasi ai ma sui auai e le itiiti ifo i le 15 tagata.

**VAEGA IV
TULAGA FAATAATITIA MO TOMAI FAAPITOA**

9. Tulaga faataatitia mo tomai faapitoa e ao ona fuafuaina e le Fono-(1) E tatau i le Fono ona -

- (a) fuafuaina tulaga faataatitia o tomai faapitoa e ao ona mataitu e tagata poto faapitoa i vailaau mo togafitiga;

- (b) fuafuaina so o se tulaga faataatitia o tomai faapitoa maoti e faaaogā e tagata poto faapitoa i vailaau mo togafitiga o lo o galulue tumaoti po o galulue i le Auaunaga Faa-Soifua Malolona;
- (c) fuafuaina mataupu e talafeagai i matafaioi a tagata faigaluega fesoasoani i vailaau mo togafitiga ma tekinesia o galuega tau vailaau, ma le vaavaaia o a latou galuega e tagata poto faapitoa i vailaau mo togafitiga;
- (d) faamautu ua faamaonia tulaga faataatitia o tomai faapitoa i lalo o lenei fuaiupu -
 - (i) ua ogatasi ma le pulea lelei ma le atoatoa ma le faagaioioia o falemai ma le tuuina atu o auaunaga faa-fomai ma vailaau mo togafitiga i tagata lautele;
 - (ii) ua atagia mai ai mataupu o faiga faavae a le Malo ma faiga tau pulega e faasino i le tuuina atu o auaunaga faa-fomai ma vailaau mo togafitiga e pei ona fautuaina mai lea taimi i lea taimi e le Matagaluega; ma
 - (iii) ua faamautu ai e faapea o le tuuina atu o auaunaga faa-fomai ma vailaau mo togafitiga i tagata uma o Samoa ua ausia ai tulaga faataatitia faava o malo ua taliaina ma ua ogatasi ma aia tatau a tagata soifua e faatatau i tagata uma o Samoa;
- (e) toe iloiloaina ai tulaga faataatitia o tomai faapitoa ua faamaonia ma faia ai teuteuga talafeagai i ia tulaga -
 - (i) e le itiiti mai i le tasi i le tausaga faale kalena taitasi uma; ma
 - (ii) pe afai ua faia se talosaga maoti e le Ofisa Sili o Pulega ina ia faia faapea;
- (f) ia feutagai ma le Resitara pe a fuafuaina pe suia tulaga faataatitia o tomai faapitoa ina ia faamautu ai e faapea ua ausia manaoga o le parakalafa (d);

- (g) ia logoina le Resitara i tulaga faataatitia o tomai faapitoa ua faamaonia, po o suiga i ia tulaga; ma
- (h) faia ai gaioiga talafeagai e mataitu ai ma faamalosiā ai tulaga faataatitia o tomai faapitoa e tusa ai ma manaoga o lenei Tulafono.

(3) E mafai e le Fono ona faaaogā tulaga faataatitia o tomai faapitoa o lo o faaaogāina i tagata poto faapitoa i vailaau mo togafitiga i so o se isi atunuu e avea o tulaga faataatitia o tomai faapitoa e ao ona mataituina e tagata poto faapitoa i vailaau mo togafitiga i totonu o Samoa.

(4) E mafai e le Fono ona faavaeina se komiti e tagofiaina mataupu e talafeagai ma tulaga faataatitia o tomai faapitoa ma e mafai ona tuuina atu i lena komiti so o se galuega tauave, malosiaga ma matafaioi e uiga i tulaga faataatitia o tomai faapitoa.

10. Tulaga faataatitia mo tomai faapitoa o lo o faaaogāina i isi tomai faapitoa tau soifua maloloina e ao ona amanaiaina – I feutagaiga ma le Resitara, e tatau i le Fono ona faamautu e faapea o tulaga faataatitia o tomai faapitoa ua fuafuaina i lalo o le fuaiupu 9, ma isi Fono e faasino i le galuega o tomai faapitoa tau soifua maloloina, ua amanaia ai le matafaioi o isi tomai faapitoa tau soifua maloloina o lo o aafia ai galuega ma tiute tauave o tagata poto faapitoa i vailaau mo togafitiga, tagata faigaluega fesoasoani i vailaau mo togafitiga ma tekisisia o vailaau mo togafitiga.

VAEGA V

FAAMAUINA O TAGATA POTO FAAPITOA I VAILAAU MO TOGAFITIGA

11. Agavaa mo le faamauina-(1) Ina ia agavaa mo le faamauina e avea o se tagata poto faapitoa i vailaau mo togafitiga, e ao i se tagata ona -

- (a) umia se faailoga tikeri o le poto maoae i galuega tau vailaau mo togafitiga mai se faalapotopotoga tau aoaoga ua aloaia e le Fono e pei ona tuuina mai ai mataupu faatonuina ua taliaina mo le faamoemoe o le tausia o tulaga faataatitia e

faatatau i tagata poto faapitoa i vailaau mo togafitiga i totonu o Samoa; ma

- (b) umia se tusi faamaonia po o se faailoga tipiloma o le poto maoae i vailaau mo togafitiga ua tuuina atu i totonu o so o se atunuu ma ua aloaia e le Fono ua talafeagai lelei mo le faamaonia ai o le tagata o lo o umia lea tusi faamaonia po o tipiloma ua maua le agavaa i tulaga faataatitia i tagata poto faapitoa i vailaau mo togafitiga i totonu o Samoa; ma
 - (c) ua uma ona ia faatinoina se poto masani e galue ai i le galuega tau vailaau mo togafitiga e pei ona manaomia ai e le Fono; ma
 - (d) ia le itiiti ifo i le 21 tausaga le matua; ma
 - (e) ia amio lelei ma tauleleia.
- (2) E tatau ona avea o matafaioi a le tagata talosaga le faamalieina o le Fono i manaoga mo le faamauina ua taua i totonu o le faafu'aiupu (1), ma e mafai e le Fono ona tolopo so o se faaiuga seia vagana ua tuuina atu e le tagata talosaga faamatalaga auiliili atoa po o le faamaoniga o –
- (a) le mataupu po o mataupu faale aoaoga sa tauaveina i aoaoga a le tagata talosaga mo le mauaina o le tikeri talafeagai, tusi faamaonia po o tipiloma o le poto maoae faatasi ma faamaumauga tau tomai faale aoaoga o le tagata talosaga;
 - (b) so o se poto masani e galue ai o lo o manaomia i le galuega tau vailaau mo togafitiga;
 - (c) so o se mataupu e talafeagai i le tagata talosaga i lona tauaveina o se auaunaga tumaoti po o e galue ai i Auaunaga Faa-Soifua Maloloina;
 - (d) so o se faamauina i le taimi nei mo galuega tau vailaau mo togafitiga i totonu o Samoa po o se isi nofoaga o lo o umia e le tagata talosaga;
 - (e) so o se faamauina o le taimi nei ua agavaa i ai mo le galuega tau vailaau mo togafitiga e umia e le tagata talosaga, e aofia ai le tausisia o so o se manaoga ina ia tauave pea aoaoga faaauau;

- (f) faamatalaga e iloa ai, tausaga o le matua, amio ma le igoa tauleleia o le tagata talosaga; ma
- (g) so o se gaioiga tau amioga pulea ua faia faasaga i le tagata talosaga i le avea ai o se tagata poto faapitoa i vailaau mo togafitiga i totonu o Samoa ma so o se isi nofoaga.

(3) So o se tagata o ia lea sa faamauina e avea o se tagata poto faapitoa i vailaau mo togafitiga i lalo o le Tulafono o Fale Talavai 1976 e tatau i le taimi lava lea a o lumanai ai le amata faamamaluina o lenei Tulafono ona agavaa e faamauina e avea o se tagata poto faapitoa i vailaau mo togafitiga, i lalo o lenei Tulafono.

12. Tusi talosaga mo le faamauina-(1) E tatau i talosaga uma mo le faamauina e avea o se tagata poto faapitoa i vailaau mo togafitiga ona -

- (a) faia i se faiga tusitusia i le Failautusi i se faiga ua faamaonia e le Fono;
- (b) tuuina atu faatasi ma se totogifuapauina o le talosaga;
- (c) tuuina atu faatasi ma faamatalaga lata mai e lua o tomai ma uiga masani e faatatau i le amio lelei, tauleleia ma le agavaa i tomai faapitoa o le tagata talosaga sa tuuina atu e tagata poto faapitoa ua aloaia lelei i vailaau mo togafitiga (i totonu o Samoa po o se isi nofoaga); ma
- (d) tuuina atu faatasi ma faamatalaga molimau i le faamalieina o le Fono e uiga i mataupu ua taua i totonu o le fuaiupu 11.

13. Ia iloiloina e le Fono tusi talosaga-(1) E tusa ai o talosaga taitasi uma mo le faamauina, e tatau i le Failautusi ona faamautu mai e faapea ua tausisia manaoga o le fuaiupu 12, ma i luga o le faamalieina, e tatau i le Failautusi ona faaoo atu le mataupu i le Fono i se taimi vave lava e mafai ai.

(2) I le iloiloina o so o se talosaga mo le faamauina, e mafai e le Fono ona –

- (a) manaomia le tagata talosaga ina ia faatalanoaina e se toatasi (1) po o le sili atu o sui auai o le Fono ua filifilia e le Fono;
- (b) manaomia le tagata talosaga ina ia oo mai i luma o le Fono ina ia suesueina i luga o se tautoga, lea e mafai ona faia e le Taitaifono;
- (c) tuuina atu so o se faatonuga i le Failautusi e faamaonia ai so o se mataupu e talafeagai i le talosaga pe saili so o se isi faamatalaga e talafeagai i ai; ma
- (d) manaomia so o se tagata ina ia faamaonia e ala i se tautinoga faale tulafono so o se itu e uiga i le talosaga.

14. Faaiuga a le Fono-(1) E tusa ai o so o se talosaga mo le faamauina ua iloiloaina e le Fono, e mafai e le Fono ona -

- (a) tolopo le iloiloga o le talosaga seia vagana -
 - (i) ua tuuina atu e le tagata talosaga so o se isi faamatalaga po o so o se faamaoniga e manaomia e le Fono;
 - (ii) ua tausia e le tagata talosaga se manaoga sa faia e le Fono i lalo o le fuaiupu 13(2); po o
 - (iii) ua faia faapea e so o se tagata ua manaomia e le Fono e tuuina atu se faamaoniga o so o se mataupu e ala i se tautinoga faale tulafono;
- (b) faamaonia le tusi talosaga; po o
- (c) o le teena o le talosaga.

(2) E tatau i le Failautusi ona fautuaina le tagata talosaga i se faiga tusitusia i so o se faaiuga ua faia e le Fono i se taimi vave lava e mafai ai.

(3) Afai ua faamaonia se talosaga mo le faamauina, e tatau i le Failautusi ona fautuaina le Resitara e faapea ua faatagaina e le Fono le faamauina o le tagata talosaga, ma e tatau ona tuuina atu so o se faamatalaga e pei ona manaomia ai e le Resitara ina ia tausia lelei le tusi resitala.

15. Tusi faamaonia o le faamauina – I le tusia ai i totonu o le tusi resitala, e tatau ona agavaa le tagata ua faamauina i le mauaina o se Tusi Faamaonia o le Faamauina ua tuuina atu e le Resitara.

16. Tusi faamaonia faale tausaga e galue ai-(1) E tatau i tagata taitoatasi uma ua faamauina i totonu o tausaga taitasi uma ona totogi atu le totogifuapauina faatonuina i le Failautusi mo le tuuina atu o se tusi faamaonia faale tausaga e galue ai.

(2) E tatau i tusi faamaonia taitasi ona -

(a) faia i se pepa faatumu ua faamaonia e le Fono;

(b) faamutaina i le aso 31 o Tesema i le tausaga lea sa tuuina atu ai; ma

(c) tuuina atu e le Resitara po o Failautusi e tusa ai ma so o se faatulagaga ua faia i le va o le Fono ma le Resitara.

(3) E mafai e le Fono ona fuafuaina e faapea o le tulaga ua agavaa ai i se tusi faamaonia e galue ai e faalagolago i luga o le tagata ua faamauina o lo o tauaveina pe ioe e tauaveina so o se mataupu po o mataupu o aoaoga faaauau ua faamaonia e le Fono.

17. Tusi faamaonia le tumau e galue ai-(1) E ui lava i so o se aiaiga o lenei Tulafono i se isi tulaga e ese ai, e mafai e le Fono ona faia ina ia tuuina atu i se tagata, o ia lea ua ia faia se tusi talosaga mo le faamauina i lalo o lenei Tulafono, se tusi faamaonia le tumau e faatagaina ai e galue i galuega tau vailaau mo togafitiga ina ia tusa ai ma so o se tuutuuga ua faaeeina atu e le Fono ma faamatalaina ai i totonu o le tusi faamaonia.

(2) E mafai ona tuuina atu se tusi faamaonia le tumau e galue ai i lalo o lenei fuaiupu i se tagata talosaga, o ia lea o lo o aoga i mataupu o suesuega talafeagai i fafo atu o Samoa ma o ia lea –

(a) ua tuuina atu se talosaga ina ia faia ni aoaoga tau galuega i se fale talavai o se falemai po o isi auaunaga faa-soifua maloloina i totonu o Samoa;

(b) ua talia na te faia se aoaoga tau galuega a le Auaunaga Faa-Soifua Maloloina, fale talavai po o isi auaunaga faa-soifua maloloina; ma

- (c) ua faia se galuega e tusa ai ma so o se faatonuga ua tuuina atu e le Fono, le Auaunaga Faa-Soifua Maloloina po o se tagata poto faapitoa o lo o pulea le fale talavai po o isi auaunaga faa-soifua maloloina, i le a lava le tulaga e manaomia ai.
- (3) O se tusi faamaonia ua tuuina atu i lalo o lenei fuaiupu e le mafai ona tumau pea lona faamamaluina mo se vaitaimi e sili atu i le 3 masina talu le aso na tuuina atu ai peitai e mafai ona toe faafou e le Fono mo se isi vaitaimi e le sili atu i le 3 masina i taimi taitasi.
- (4) E mafai e le Fono ona faalēaogā se tusi faamaonia sa tuuina atu i lalo o lenei fuaiupu mo so o se mafuaaga ma so o se taimi a o faagasolo lona faaaogāina.

VAEGA VI
FAAFOEGA O AMIOGA PULEA A TAGATA POTO
FAAPITOA I VAILAAU MO TOGAFITIGA

18. Tualumaga o amioga pulea e faatatau i tagata poto faapitoa i vailaau mo togafitiga-(1) E mafai ona faia gaoioiga tau amio pulea e faasaga i se tagata poto faapitoa i vailaau mo togafitiga mo -

- (a) le solia o tulaga faataatitia o tomai faapitoa;
- (b) so o se gaoioiga po o se mea ua le faia e le tagata poto faapitoa i vailaau mo togafitiga i le faagasologa o le galuega a le tagata poto faapitoa i vailaau mo togafitiga lea ua faatamala, lē faaeteete, lē talafeagai, lē taualoa, po o le lē faautauta ua lamatia ai le ola po o le soifua maloloina o so o se tagata;
- (c) so o se solitulafono ua faia e se tagata poto faapitoa i vailaau tau togafitiga lea e fesootai faatasi ai i se isi auala ma le galuega po o tiute tauave o le tagata poto faapitoa i vailaau mo togafitiga; po o
- (d) so o se solia po o le lē tausisia o le mataituina o se faatonuga ua tuuina atu po o manaoga ua faaee atu e so o se tagata ua tuuina i ai le malosiaga e le tulafono po o konekarate e tuuina atu ai faatonuga po o le faaee atu o manaoga i le tagata

poto faapitoa i vailaau mo togafitiga lea e faatatau i le galuega po o tiute tauave o le tagata poto faapitoa i vailaau mo togafitiga.

(2) O gaoioiga uma e faafoe ai amio pulea ua faia e le Fono e faasaga i tagata poto faapitoa i vailaau mo togafitiga e tatau ona faia ina ia tusa ai ma taualumaga ua faatonuina mai i le Vaega V o le Tulafono o le Faamauina ma Tulaga Faataatitia mo Tomai Faapitoa tau Soifua Maloloina.

19. Toe faamauina - Afai ua teena po o ua soloia le faamauina o so o se tagata poto faapitoa i vailaau mo togafitiga e le Fono po o se Komiti o Amioga Pulea i lalo o le Tulafono o le Faamauina ma Tulaga Faataatitia mo Tomai Faapitoa tau Soifua Maloloina, e le tatau ona noatia le Fono e iloiloia nisi talosaga faaopoopo a lea tagata mo le faamauina i lalo o lenei Tulafono mo se vaitaimi ua fuafuaina i mataupu taitasi e le Fono, lea e le tatau ona itiiti ifo nai lo se vaitaimi e lua (2) tausaga talu ona teena po o soloia.

VAEGA VII

TOMAI FAAPITOA LAGOLAGO TAU FALE TALAVAI

20. Faatonuina o tagata galulule fesoasoani i fale talavai ma tekisisia - E mafai e Le Ao o le Malo, i le faia i luga o le fautuaga a le Kapeneta, ona faia tulafono faatonutonu e faasino i tagata faigaluega fesoasoani ma tekisisia o fale talavai, e aofia ai ae le faatapulaaina i -

- (a) tiute tauave ma matafaioi ia e ono mafai ona faatino e tagata faigaluega fesoasoani i fale talavai ma tekisisia;
- (b) agavaa aloaia ma poto masani mo se tagata e avea ai o se tagata faigaluega fesoasoani po o tekisisia o fale talavai;
- (c) le aloaia ma le faamalosia o tulaga faataatitia ma manaoga ua fuafuaina e le Fono e faaaogāina i tagata faigaluega fesoasoani ma tekisisia o fale talavai;
- (d) taualumaga tau le amio pulea ua faaaogāina i tagata faigaluega fesoasoani ma tekisisia o fale talavai;

- (e) faasalaga e faaono mafai ona faaee atu i luga o tagata faigaluega fesoasoani ma tekinesia o fale talavai mo le solia o amio pulea; ma
- (f) solitulafono ma faasalaga e faasino i le galuega a tagata faigaluega fesoasoani ma tekinesia o fale talavai, ma solitulafono e faia e tagata ua faamoemoe e umia ia tulaga tofi po o le faatinoina o tiute tauave o tagata tomai faapitoa lagolago mo fale talavai e aunoa ma le pule faataga faale tulafono.

VAEGA VIII SOLITULAFONO

21. Galue faasolitulafono e faapea o se tagata poto faapitoa i vailaau mo togafitiga-(1) E leai se tagata e tatau ona galue e avea ma tagata poto faapitoa i vailaau mo togafitiga po o le faaauauina o pisinisi e avea ai o se tagata poto faapitoa i vailaau mo togafitiga i totonu o Samoa, seia vagana ai ua faapea

-

- (a) ua faamauina le tagata e avea ma tagata poto faapitoa i vailaau mo togafitiga e tusa ai ma lenei Tulafono ma le Tulafono o le Faamauina ma Tulaga Faataatitia mo Tomai Faapitoa tau Soifua Maloloina; ma
- (b) o lo o umia e le tagata se tusi faamaonia e galue ai i le taimi nei i lalo o le Tulafono.

AE VAGANA AI E FAAPEA o se tagata o ia lea ua galue e tusa ai ma se tusi faamaonia le tumau e galue ai na tuuina atu i lalo o le fuaiupu 17, e mafai ona ia faia faapea e aunoa ma le faamauina.

(2) So o se tagata o ia lea ua ia solia le faafuaiupu (1) ua faia se solitulafono ma e tatau ona noatia i luga o se moliaga ua faamaonia faale tulafono i le nofosala i le falepuipui mo se vaitaimi e le silia le lima (5) tausaga po o i se sala e le silia le 100 iunite tau faasalaga, po o faasalaga uma e lua.

22. Faamoemoe sese e avea ai o se tagata poto faapitoa i vailaau mo togafitiga - O tagata taitoatasi uma o i latou ia ua faamatalaina e faapea po o ua faapea mai o ia o se tagata poto faapitoa i vailaau mo togafitiga e aunoa ma le faamauina i lalo o lenei Tulafono ma e aunoa ma le umia o se tusi faamaonia e galue ai i le taimi nei i lalo o lenei Tulafono, ua faia se solitulafono ma e tatau ona noatia i luga o se moliaga ua faamaonia faale tulafono e nofosala ai i le falepuipui mo se vaitaimi e le silia le lua (2) tausaga po o i se sala tupe e le silia le 100 iunite tau faasalaga, po o faasalaga uma e lua.

23. Vaavaaia o fale talavai e se tagata poto faapitoa i vailaau mo togafitiga - O tagata taitoatasi uma o ia lea -

- (a) o lo o ia faagaoioia po o faafoeina so o se fale talavai lea e leai se vaitaimi na i lalo ai o le vaavaaia ma le faafoega a le tagata poto faapitoa i vailaau mo togafitiga; po o
- (b) i le avea ai ma tagata poto faapitoa i vailaau mo togafitiga, ua faatamala e vaaia lelei ma faafoe le fale talavai lea e avea ai ma matafaioi a le tagata poto faapitoa i vailaau mo togafitiga e vaavaaia ma faafoe -

ua faia se solitulafono ma e tatau ona noatia i luga o se moliaga ua faamaonia faale tulafono e nofosala i le falepuipui mo se vaitaimi e le silia le lua (2) tausaga po o i se sala tupe e le silia le 100 iunite tau faasalaga, po o faasalaga uma e lua.

24. Faaamauina i se faiga sese - O tagata taitoatasi uma -

- (a) ua faia po o ua poloaia le faia o so o se tusitusiga sese i totonu o le tusi resitala; po o
- (b) ua ia mauaina po o ua taumafai e faamauina lea tagata po o so o se isi tagata i lalo o lenei Tulafono e ala i le faia o so o se faamatalaga sese po o faamatalaga po o tautinoga taufaasese; po o
- (c) tuuina atu so o se faamatalaga sese po o ua sainia faagaoi pepa aloaia e lagolago ai se talosaga mo le faamauina i lalo o lenei Tulafono -

ua faia se solitulafono ma e tatau ona noatia i luga o se moliaga ua faamaonia faale tulafono e nofosala ai i le falepuipui mo se

vaitaimi e le silia le fitu (7) tausaga po o se sala tupe e le silia le 100 iunite tau faasalaga, po o faasalaga uma e lua.

25. Mauaina o komisi mai fomai ma fomai nifo – So o se tagata poto faapitoa i vailaau mo togafitiga, po o le tagata e ona po o le pule o se fale talavai o ia lea e tuuina atu, ofoina po o ua malie e tuuina atu pe ofoina atu i so o se fomai po o fomai nifo, po o so o se isi tagata, so o se tupe po o isi tau tau tupe e avea ma komisi po o tau mo pepa talavai, ua faia se solitulafono ma e tatau ona noatia i luga o se moliaga ua faamaonia faale tulafono e nofosala ai i le falepuipui mo se vaitaimi e le silia le lua (2) tausaga po o se sala tupe e le silia le 100 iunite tau faasalaga, po o faasalaga uma e lua.

VAEGA IX AIAIGA ESEESE

26. E leai se tagi e mafai ona faia faasaga i le Fono ma isi-(1) E le tatau ona noatia le Resitara, le Matagaluega, le Fono, sui auai o le Fono ma le Failautusi mo so o se mea ua leiloa po o ua faaleagaina ua mafatia ai so o se tagata e mafua mai i so o se gaoioiga ua faia po o ua le faia e uiga i le faamauina ma le faafoeina o amioga pulea a tagata poto faapitoa i vailaau mo togafitiga ma auunaga mo tomai faapitoa lagolago tau fale talavai i lalo o lenei Tulafono.

(2) O le matafai oi mo le faavaeina o se aia tatau e ao ai ona faamauina i lalo o lenei Tulafono, ma mo le faamaoniga o faamatalaga uma ua tuuina atu e lagolago ai se talosaga mo le faamauina e tatau ona i le tagata talosaga.

27. Totogifuapauina - E mafai e le Fono mai i lea taimi i lea taimi ona fuafua -

- (a) le ituaiga totogifuapauina e ao ona totogiina i lalo o lenei Tulafono; ma
- (b) le aofaiga o ia totogifuapauina.

28. Tulafono Faatonutonu-(1) E mafai e Le Ao o le Malo mai i lea taimi i lea taimi, i le faia i luga o le fautuaga a le Kapeneta, ona faia ia tulafono faatonutonu uma e pei ona tatau

pe talafeagai mo le faamamaluina atoatoa o aiaiga o lenei Tulafono.

(2) E aunoa ma le faatapulaaina o le tulaga lautele o le faafuaiupu (1), e mafai ona faia tulafono faatonutonu e faasino i

—

- (a) le tuuina atu o vailaau malolosi i totonu o falemai, vaega o togafitiga faa-soifua maloloina, falemai tumaoti, galuega faa-fomai, isi auaunaga tau soifua maloloina ma so o se faleoloa, pisinisi po o nofoaga;
- (b) so o se mataupu ua fesootai ma tulafono e faasino i pulega o mea taumafa, vailaau malolosi, vailaau oona ma nakoti ina ia faamamaluina atoatoa ai aiaiga o ia tulafono;
- (c) faagasologa mo le faamaoniga o vailaau malolosi, ma vailaau oona, pe mo le faatapulaaina po o le faasaina o le faamatuu atu po o le faaaogāina o nisi vailaau malolosi po o vailaau oona i totonu o Samoa;
- (d) le faamaninoina o manaoga ua faaaogāina i lalo o le fuaiupu 23 e faasino i le vaavaaia o fale talavai e tagata poto faapitoa i vailaau mo togafitiga ma lalo o le fuaiupu 25, e faasino i pepa talavai faatonuina mai fomai ma fomai nifo;
- (e) le faatonuina o pepa faatumu o tusi talosaga, tusi faamaonia ma isi pepa aloaia e manaomia i lalo o lenei Tulafono, ma le faiga lea e mafai ona faaoo atu ai faasilasilaga, ma taimi o le a tatau ai ona faatatauina e faapea ua maea ona faaooina atu;
- (f) le faatonuina o totogifuapauina e totogi e tusa ai o aoaoga, suega ma le faamauina i lalo o lenei Tulafono, e tusa ai o so o se suiga o po o faaopoopoga i so o se tusi resitala ua tausia i lalo o lenei Tulafono, ma e tusa ai o so o se isi mataupu i lalo o lenei Tulafono; ma
- (g) le faatonuina o totogifuapauina e le silia le 100 iunite tau faasalaga mo le solia o so o se tulafono faatonutonu.

29. Soloia – Ua soloia le Tulafono o Fale Talavai 1976.

30. Aiaiga tau soloaiga ma aiaiga faasaoina-(1) O le faamauina o tagata poto faapitoa i vailaau mo togafitiga i lalo o le Tulafono o Fale Talavai 1976, e tatau ona faaauau pea ona faamamaluina atoatoa ma faamalosia e faapei ai na faamauina i lalo o lenei Tulafono.

(2) O tusi faamaonia uma e galulue ai na tuuina atu i lalo o le Tulafono o Fale Talavai 1976, e tatau ona faaauau pea ona faamamaluina atoatoa ma faamalosia seia aulia le aso 31 o Tesema lea e sosoo ai ma le faamamaluina o lenei Tulafono.

(3) O faaiuga uma a le Komiti o Fale Talavai ua faia i lalo o le Tulafono o Fale Talavai 1976, ma taualumaga o amioga pulea ma taualumaga faasolitulafono ua faia e po o e avea ai ma sui auai o le Komiti o Fale Talavai po o ua aliae mai i po o i lalo o le Tulafono o Fale Talavai 1976 i le taimi na amata faamamaluina ai lenei Tulafono, e tatau ona faatatauina e faapea na faia ma faaaogāina i lalo o lenei Tulafono.

(4) So o se faasinomaga i tulafono (e ese ai nai lenei Tulafono) i le Tulafono o Fale Talavai 1976, e tatau ona avea e faapea o se faasinomaga i lenei Tulafono vagana ai e faapea e manaomia e le mataupu se isi uiga e ese ai.

**O le Tulafono o Fale Talavai 2007 o lo o faafoeina e le
Matagaluega o le Soifua Maloloina.**

**Lolomiina e le Failautusi o le Fono Aoaofaitulafono,
i le pule a le Fono Aoaofaitulafono.**